

**PM intai teknologi tenaga alternatif Abu Dhabi**  
**Malaysiakini.com**  
**January 31, 2011**

Perdana Menteri Datuk Seri Najib Tun Razak berkata satu kajian akan dilaksanakan mengenai tenaga alternatif yang sedang dibangunkan oleh Abu Dhabi bagi melihat sama ada teknologi yang terlibat boleh diguna pakai di Malaysia.

"Jika inilah keadaannya, kita akan menggalakkan bandaraya Masdar dan Mubadala Development Company untuk melabur atau bekerjasama dengan rakan di Malaysia bagi membangunkan tenaga alternatif di negara kita," katanya.

Beliau berkata demikian kepada media Malaysia sebelum berlepas pulang selepas mengadakan lawatan kerja sehari ke Abu Dhabi di mana beliau merasmikan forum "Invest Malaysia 2011" semalam.

Najib telah mengambil peluang itu untuk melawat Bandaraya Masdar, satu pembangunan meneutralkan karbon bernilai berbilion dolar di padang pasir Abu Dhabi.

Bandaraya Masdar adalah satu pembangunan mesra pejalan kaki berkapadatan tinggi teknologi tenaga diperbaharui dan bersih yang sedang dilaksanakan dan akan datang, dipamerkan, dipasarkan, dilakukan penyelidikan, dibangunkan, diuji dan dilaksanakan.

Menjelaskan lebih lanjut, Najib berkata kajian itu, antara lain akan mengkaji aspek kos menggunakan sumber tenaga diperbaharui seperti solar dan angin.

"Kita ingin tahu, sebagai contoh, kos tenaga solar setiap jam kilowatt, sama ada ia opsiyen berdaya maju berbanding tenaga yang sedang dikeluarkan melalui grid kuasa nasional," katanya.

Malaysia, katanya juga berminat mempelajari lebih banyak mengenai pengalaman Emiriah Arab Bersatu (UAE) di dalam pembangunan tenaga nuklear.

Melalui perancangan bagi penempatan 50,000 penduduk serta ratusan perniagaan, Bandaraya Masdar akan menyepadukan sepenuhnya pelbagai tenaga diperbaharui dan teknologi mampan, yang merentasi kehidupan dan pekerjaan komuniti itu.

Masdar, satu syarikat kepelbagaian tenaga diperbaharui, adalah satu anak syarikat milik penuh Mubadala Development Company, iaitu jentera pelaburan kerajaan Abu Dhabi.

--Bernama